

**Biografi Tokoh MIC Tan Sri Devaki Krishnan Dilancar Rabu Ini
Bernama
11 Ogos, 2013
Oleh Siti Salwa Shaari**

KUALA LUMPUR, 11 Ogos (Bernama) -- Kisah hidup dan pengalamann tokoh veteran MIC dan aktivis sosial Tan Sri Devaki Krishnan, wanita pertama bertanding pada pilihan raya terbuka di negara ini, dimuatkan dalam biografinya yang dijadual dilancarkan Rabu ini.

Biografi bertajuk 'Tan Sri Devaki Krishnan: With Elegance and Commitment' setebal 192 halaman itu juga menceritakan bagaimana beliau tertarik untuk melibatkan diri dalam aktiviti berpersatuan, sesuatu yang dianggap melawan arus satu ketika dulu.

"Saya sedar saya telah menanamkan azam tidak mahu menjadi wanita biasa pada usia sembilan tahun. Kami sekeluarga ketika itu menetap di Sri Lanka, tempat kelahiran ayah dan merasai pengalaman pilihan raya diadakan. Saya melihat seorang wanita menang (pilihan raya) dan sejak itu saya menetapkan sasaran untuk menjadi seperti beliau," katanya kepada Bernama.

Dilahirkan pada 11 Mac 1923 di Port Dickson, Negeri Sembilan, Devaki berkata beliau sebenarnya agak keberatan untuk membenarkan kisahnya dibukukan untuk tatapan umum, apatah lagi pernah mengalami pengalaman buruk dengan beberapa individu yang mendakwa berminat untuk menerbitkan biografinya.

"Saya akhirnya bersetuju selepas ramai yang memujuk supaya pengalaman saya diabadikan dalam sebuah buku kerana ia sebahagian daripada sejarah negara, dan selama sembilan bulan, rumah saya di Brickfields menjadi persinggahan wajib penulis Kamala M.G. Pillai," katanya.

Devaki, 90, yang menyertai Parti Kemerdekaan Malaya (IMP) atas pelawaan Datuk Onn Jaafar seawal usia 20an, berkata pilihan raya bagi Majlis Perbandaran Kuala Lumpur pada 1952 ialah permulaan rasmi baginya dalam menceburi bidang politik.

"Saya tidak tahu nama saya disebut-sebut untuk bertanding dan hanya mengetahuinya daripada suami, P. Krishnan. Beliau agak bimbang dan bertanya jika saya mahu (bertanding) dan saya jawab 'ya' dan yakin Tuhan akan menjaga saya," katanya. Suaminya meninggal dunia pada 1998.

Walaupun berdebar kerana pertama kali bertanding pada masa itu, Devaki optimis akan mendapat sokongan daripada pelbagai kaum kerana kerjaya beliau sebelum itu sebagai guru di ibu kota menyebabkan ramai orang mengenalinya.

"Pada masa itu, kami bebas berkawan...tiada siapa membangkitkan isu kaum atau agama. Kami telah lama menghayati konsep 1Malaysia dan kejadian jenayah juga sangat sedikit menyebabkan saya rasa selamat walaupun lewat pulang ke rumah," katanya.

Wanita India Malaysia pertama mendapat gelaran Tan Sri (pada 3 Jun 1995) itu juga bersyukur kerana walaupun tidak terlibat dalam politik, suaminya tetap memberi galakan supaya beliau aktif dalam pelbagai persatuan.

Satu ketika dulu, Devaki pernah terlibat dalam 72 persatuan dalam tempoh masa yang sama.

"Suami hanya minat berniaga tapi beliau sangat berfikiran terbuka. Beliau mengajar saya untuk memandu dan saya ingat ada segelintir lelaki terkejut apabila saya memandu sendirian. Ingat, ini berlaku pada 1952 apabila kaum wanita hanya dianggap sesuai berada di rumah," jelasnya.

Bagi Devaki, antara kejayaan beliau adalah mengajak wanita untuk menyertai politik terutama selepas sayap Wanita MIC ditubuhkan di peringkat nasional pada 1975.

"Saya bercakap dengan mereka, terangkan kebaikan yang boleh diperoleh dan bagaimana mereka boleh terlibat tanpa mengabaikan keluarga. Saya jadikan diri saya sebagai contoh.

"Walaupun aktif, saya tetap meluangkan masa bersama keluarga, mengambil tahu pelajaran anak-anak dan tidak pernah ketinggalan meraikan hari jadi mereka," katanya.

Pada usia ini, Devaki yang merupakan Pengerusi MIC Bahagian Syed Putra selain aktif dalam beberapa persatuan tidak menunjukkan tanda untuk berundur selagi 'khidmatnya masih diperlukan'.

"Saya tidak tahu jika saya boleh duduk diam," katanya yang mempunyai tiga orang anak. Seorang anaknya sudah meninggal dunia dan dua yang lain, iaitu seorang lelaki dan seorang perempuan, kini menjadi doktor.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=969337>